

四庫全書

史部

欽定四庫全書

史部

硃批諭旨卷七十八至八十一

臣 永瑤 恭校

編修 臣 裴謙 覆勘

總校官中書 臣 朱 鈐

校對官中書 臣 朱 圻

謄錄監生 臣 周元濬

欽定四庫全書

硃批諭旨卷七十八

硃批胡瀛奏摺

雍正七年二月初九日江西按察使臣胡瀛謹

奏為敬陳管見事竊臣備員江臬職司明刑夙夜兢

惕惟期寬嚴適當以仰副

聖明欽恤之仁乃體察獄情參考刑書見律條內尚有
未經該載及可以斟酌變通之處敬為我

皇上陳之一賊數滿貫之竊盜宜定勒緝之處分一盜竊鞘餉之犯宜嚴加治罪一謀殺親夫拐逃姦婦之姪兇不宜仍引監候一軍流人犯時值冬月中途留養之例尚宜斟酌以上各條關係盜賊民命刑獄重務是否可採伏祈

皇上睿鑒飭部議覆施行謹

奏

大學士會同該部詳議具奏

同日又

奏為直陳江省吏治仰祈

睿鑒事竊聞民生之休戚關乎吏治而吏治之大綱無

過錢穀刑名查江省錢糧自前撫

臣

邁柱清查之

後頭緒井然年來接任之員易於經理有能按籍

徵收全完者洵為稱職上司保題陞調以示鼓舞

實至公至當之舉也但有司職分不止催科如聽

斷刑獄弭盜安良關係民生甚為緊要

臣

備員江

臬經理刑書每見屬員必諄諄勉勵間有能辦錢穀者不盡諳於刑名雖多方勸懲未盡改革始疑人之才力各有短長今細加體察乃知別有私心以為錢糧全完即可薦舉刑名案件尚在其次今若不行詳加考核但以善於催科即行薦舉則庸碌姦巧之徒皆得冒濫何由正人心而飭吏治乎查雍正四年三月定例文職官員任內有承追督催錢糧未完議處之案不准保題等語臣愚以為

錢糧

國用所關刑獄民命攸係應請嗣後薦舉保題人員
除無承追督催錢糧未完處分之案外必查其行
止端正聽斷明敏無已叅遲延未結命盜事件俱
於本內聲明方准保題則地方有司於錢穀刑名
咸知並重實心辦理而無巧飾之弊其於吏治獲
益不淺矣臣管窺之見是否可採伏乞

皇上睿鑒施行謹

奏

此奏殊屬荒謬之至朕從未有但以催科甄別優劣之
諭旨而國家用人亦未有將刑名輕視於錢糧之理身
膺臬司之職凡通省舉劾皆任其責而聽憑督撫保題
庸碌姦巧之人汝豈聾瞽乎卽部中又何嘗將已叅遲
延未結案件概置之不問一任督撫薦舉陞調耶若照
所請以行止端正聽斷明敏無據空言定為考語不過
開汝等不肖藩臬高下其手之端甚非察吏之良法據

此汝必與巡撫不和否則或被屬員有所輕賤而懷洩憤之心耳慎為之

雍正七年七月初五日江西按察使

臣胡瀛謹

奏為恭繳

奏摺事竊

臣

於雍正七年二月初九日為直陳江省

吏治等事摺

奏奉到

硃批

臣

謹祇領伏惟

臣

本庸愚受

皇上洪恩備員江臬夙夜冰兢雖地方吏治時切留心
但知識短淺賦質昏庸謬陳鄙見妄瀆

宸聰乃蒙我

皇上憫臣愚昧

訓誨諄詳臣跪讀之下恍如夢覺悚惶無地感激涕零

惟有竭盡愚忱和衷供職以仰答

主知於萬一必不敢自貽罪戾也所有奉到

硃批原摺理合恭繳伏乞

睿鑒謹

奏

凡為人臣者欲克盡厥職保全身名惟應務一公字捨此而巧詐自私自立意沽名釣譽縱竭其伎倆未能遂志至身名俱敗時追悔無及矣古聖賢垂論甚詳且備世人多務虛文而忽其實理每觀不肯為國致身任勞任怨恃一己智術倖免者千百中不過一二默默之中仍伏冥誅人多不得而知耳夫榮辱利害何必關心但竭

盡臣節以對

天卽君上之喜怒褒貶尚置之度外何況宵小輩之偏好偏惡私譽私毀千岐萬派豈能一一周旋而無遺耶如得本何愁末凡夫庸流往往見不及此一生勞勞用盡巧詐究竟成一笑柄寧不可惜聽朕訓旨只在根本處研究不必逐末勉之將此批諭與汝同城官員看皆令知之

雍正七年十月初八日江西按察使臣胡瀛謹

奏本年八月初五日齋摺家人捧到臣前奏恭謝

聖訓一摺欽奉

硃批諭旨

臣跪讀之下如覲

天顏感刻五中繼之以泣隨遵宣

上諭同城官員莫不敬聆

聖訓一體周知臣伏念人臣事

主當如愛親敬

天其根本處只有忠孝不忠何以全孝不公又何以成忠

大哉

王言公之一字以之事

君則能體國以之臨民則能服物徇私非公而干譽亦
非公偏執非公而徇衆亦非公不特一生勞勞用
盡巧詐非公即有意矯矯不能任勞任怨亦非公
公之真偽默默中自有鑒觀人不得而知而惟寸
心知之也茲蒙我

皇上天語丁寧

臣

惟有銘骨鏤心勉供厥職辨賢姦以

定舉劾鋤豪惡以安良善至榮辱利害古今常有
只患臣心不公自干罪戾果能公忠不二可以告

天地質鬼神

聖主明並日月自能仰邀

睿鑒也為此繕摺望

闕九叩恭繳

聖諭臣不勝惶悚瞻仰之至謹

奏

果能言行相符朕復何慮勉之

同日又

奏雍正七年四月內欽奉

上諭各省富戶鄉紳當體恤貧民該部行文督撫刊刻

通行曉諭遵行欽此江省奉到之日署撫_臣張坦麟

卽牌行布政司敬謹刊刻分頒曉諭去後因布政

使_臣李蘭轉發牌文內有令各屬將分送過富戶

鄉紳姓名造冊開報之語以致各屬差役社保等

沿戶挨查凡稍溫飽之家著將姓名填入富戶冊
內報官索錢到手始免開列現據進賢縣民樊子
亮南昌縣監生劉思試豐城縣監生李陳謨等各
控准地方官查究在案至八月初五日李蘭始行
文各府轉飭州縣停止造冊一切差票盡行掣銷
在布政使臣李蘭偶不經心誤添造冊開報一語
因而胥蠹作姦遂與

上諭有毫釐千里之謬今江西一省如此臣聞江南有

游手好閒之輩登門索騙富戶者有無恥生員假鄉試盤費不足之名勒索富戶者經督臣范時繹出示曉諭嚴禁其風始熄誠恐各省間有奉行失實者臣不揣冒昧仰懇

聖主弘慈再頒

諭旨宣示各省督撫布按通飭州縣令其恭繹前頒

上諭毋得粗心誤行查造富戶名冊以啟胥役滋擾之弊而無賴之憊棍劣衿亦不得借端需索則普天

率土共知

皇上敦厚風俗警世覺民之至意矣為此謹

奏

此奏可嘉處不勝批諭天下事真有可為長嘆息者所以云奉行不善卽堯舜之仁皆成苛政也另有旨由部頒發

同日又

奏為陳請飭查罰贖銀兩以收實用事竊照金作贖

刑載自虞典至周穆王而按五刑之輕重定贖數之多寡是贖鍰之制唐虞三代已有之矣我

朝欽定爰書至詳至慎媲美三代以上之治凡直省官員審理詞訟在理曲者察其有力稍有力二等春夏罰銀秋冬罰穀年底題報銀則解部充餉穀則貯倉備賑定例昭然原毋許承審官員任意濫罰私收滋弊者也今查直省官員自理詞訟所罰銀穀多有私罰肥己不行報明歸公者

臣請

皇上敕部通行直省除地方惡紳劣生富豪有意犯法
及犯罪至軍流者不准罰贖外至承審官員有戶
婚田土訐告審虛犯徒罪以下者准其照律納贖
將所罰銀穀實數報明上司立案倘有隱匿不報
及以多報少濫罰等弊勿論充公與否卽以貪員
叅究臣更有請者直省城垣學校倉廩之類皆有
司所必當修理者倘一一取之庫銀而正項虧矣
不若以本地之贖鍰存為地方之公用惟奏銷時

題明罰過動用數目免其解部充餉一則可以杜絕侵蝕二則可以整理地方三則可以免那正項於

國課民生甚有裨益如果臣言可採伏乞

皇上睿鑒施行謹

奏

勸諭富戶體恤貧民之善政尚然顛倒奉行至於此極斯事如何可行徒令宵小輩妄生議論耳地方上有實

心任事吏畏民懷之督撫不待朕諭自能一一斟酌舉
行若遇庸劣兩司道府不過徒滋紛擾顛倒是非公然
開市惠營私之門於民生毫無裨益若言及國課更屬
可鄙可笑之論矣

硃批諭旨卷七十八

欽定四庫全書

硃批諭旨卷七十九

硃批李元英奏摺

陝西平慶道臣李元英謹

奏為遵

旨奏聞仰邀

睿鑒事竊臣至愚極陋蒙

皇上隆恩擢用平慶道

召至養心殿面奉

訓旨教誡諄諄又奉

諭旨令

臣

將所知地方事務具摺交本王轉奏欽此

臣

抵平慶道任奉督

臣

岳鍾琪行委會同寧夏道董

新策查勘寧夏新築八旗城工衙署營房有無浮

冒果否堅固

臣

一路查訪頗有怨聲俱云從前估

計城工原未詳細而經理督修者又皆冒昧從事

假公濟私所用木石磚瓦鐵釘等項件件累民以

致密戶陳萬言等怨恨沸騰寧夏三衛賠累難堪
冤抑莫訴及臣至寧夏查勘城垣外面用磚包砌
裏面與城頂惟用土堆築虛鬆不堅再查勘各衙
署概用木釘間架窄狹而營房更為不堪木植旣
屬細小止用草簾一頂遮蓋上鋪薄土搭蓋平棚
而已所以上漏下濕不蔽風雨每多坍塌如此緊
要城工而被估計督修承修各官王景灝楊廷相
趙世朗嚴世傑等彼此回護推卸不肯實心料理

營私貽悞臣不敢不據實奏

聞伏候

皇上乾斷至糧草一項最為緊要寧夏一歲所收之糧
止可供寧鎮兵丁之需今添此三千滿洲官兵既
未定隣近之撥運又地方所出有限目前最為急
務臣已稟撫臣石文焯聽其作何籌計撥運矣至
將軍衙門並各衙門之經制書役及心紅紙張各
役工食等項俱未議定章程從前始事之官亦難

免草率之咎謹繕摺奏

聞伏祈

皇上睿鑒謹

奏

已用爾為按察使矣將摺內所奏各情由備悉詳明該督撫看伊等作何料理奏聞朕自有裁酌此奏甚屬可嘉向後莫移此志諸凡勉力秉公為之

陝西蘭州按察使

臣

李元英謹

奏為恭謝

天恩事竊

臣

賦性庸愚材質駑鈍蒙我

皇上格外天恩以知州而擢用監司越陞數等到任未

及三月復蒙

皇上特授臬司

隆恩異數至矣極矣茲接

臣

胞兄佛保家信奉

旨特授湖廣鎮筭總兵官又臣子侍京繼與佛保為子

者荷蒙

皇上特放佐領是臣父子兄弟一門均沐

皇恩浩蕩犬馬尚且知恩臣具有人性能不感泣思奮

惟有交相勸勉必思整頓巖疆安輯地方必思屏

絕私情正已率屬始終如一不違初志庶幾上報

皇上殊恩於萬一所有感激血忱實難遏抑用敢繕摺

恭謝

天恩謹

奏

朕如此加恩心非木石寧不知感何待奏陳但恐思路一邪而感激之忱隨化為烏有耳每觀福量淺薄不能承受之徒往往如此自御極以來蒙朕特恩擢用者頗不乏人朕原期其感恩圖報庶幾利濟於

社稷蒼生設或徇欲昧理因私害公而冀朕袒護姑息不可得也爾等漢軍及滿洲大小臣工於利之一字勘破者少殊不悟因些微小利致斷送身家喪失名節為失計之大也總之服官第一以操守為要勉之勉之最難

事也莫作等閒看其間義利之分公私之辨幾微不審
後悔何及可惜朕恩卽付之流水矣慎之慎之

陝西蘭州按察使臣李元英謹

奏為恭繳

硃批事竊臣前奏恭謝

天恩一摺實由感切寸心不能遏抑冒昧陳

奏仰蒙

皇上硃批訓諭詞嚴義切教誡周詳臣跪讀之下感激

涕零惟有敬誌於心朝夕默誦時時警惕以為終身之戒庶不負我

皇上訓勉之洪恩於萬一耳所有奉到

硃批理合恭繳謹

奏

近日爾之聲名雖無甚不好處較前志操則大為不如甚不敷朕所望勉之慎之

陝西蘭州按察使

臣

李元英謹

奏為奏

聞事竊臣沐

皇上天高地厚之恩凡關係通省事件無論所管與非所管均當時刻留心細加體察謹以時下所聞并臆見所及不揣冒昧備悉陳

奏一估撥之例宜為畫一也查甘省估撥定例於九月十月間將本年額徵糧石估撥次年兵食先為報部次年照數支散又因甘省營驛歲需糧五十六

萬餘石而每年額徵糧止有四十九萬餘石每於本色之外約估折色此例行之已久惟是州縣營汛多寡遠近總無一定章程以致胥吏作姦上下其手竟成錮習每於估撥之時州縣營汛紛紛營謀以求各遂其私臣查雍正二年間曾奉部文令將兵糧秉公撥定畫一造冊報部永為定例嗣經前任布政使傅德以甘省非他省可比朦混咨覆至今舞弊如故以臣愚見仍請將州縣額徵之多

寡與營汛之遠近逐一計算定為某州縣應撥某營汛若干俱為畫一以定章程永遠遵守每年奏銷不得增減改易如此則積弊可除似於倉穀兵民均有裨益矣一均丁之法宜加詳議也臣見甘肅奉行均丁之法有與他省似同而實異者蓋他省則以本州本縣之額丁均入本州本縣之地畝原額仍無增損小民自樂輸將今甘省均丁則不按地畝止按通省額徵銀糧通計合算每銀九錢

零每糧九斗零攤入一丁額徵多則攤丁亦多額
徵少則攤丁亦少以致各州縣有比原額多增至
二三千兩不等者毋怪乎紛紛具呈以為均丁之
不公也推原其故因甘省州縣中有糧少丁多者
若就本州縣均攤誠恐糧額少而載丁過重是以
泥於通融之說不復詳議但查甘肅州縣其糧少
丁多之處有產有丁現在完納者已居其六七無
產有丁艱於完納者止居其二三若以二三分之

窮丁歸入六七分之糧戶仍無過多之處況查甘
省地多糧少如有餘剩窮丁卽就本地近報開墾
猶未陞科並所有熟地未經報糧之戶均攤則有
地者不蹈隱糧之咎而無糧者免受空丁之累一
舉而兩得矣以上撥糧均丁二事原非臣之職任
然所聞如此敢不據實奏

聞伏候

聖主睿鑒謹

奏

既知成法滋弊善政失宜何不言之於早今見鍾保如此因而弄巧舞智以表已長殊負朕恩總之於朕前逞一毫機巧作用皆屬自害之道若不能真實克已奉公而惟欲假公以濟私禍一及身追悔莫及雖前車覆轍歷歷可鑒而內外臣工竟不省悟悛改朕實不解也慎之慎之

陝西蘭州按察使

臣

李元英謹

奏為奏

聞事竊本年十月初十日布政使鍾保革職奉撫臣石

文焯委

臣

暫為代理隨於十月二十八日鍾保送

到交代冊籍

臣

逐一查核除現存庫銀九十八萬

餘兩照數查收外尚有借支銀六百萬餘兩其中

欸項混雜種種不清雖非鍾保之侵蝕而實係鍾

保朦混接受於前又為遮飾於後以致庫項無著

與侵盜錢糧者何異

臣

若再因循怠玩漫不稽查

不特上負

聖主天恩卽

臣

犬馬本心亦覺自負今

臣

按欵清查每

遇一事必詳究其根底兩月以來亦不過僅得十分之三四其餘未清之項甚多尚須逐一清查謹先將查出各欵情弊及其中備細緣由另具清單

恭呈

御覽謹

奏

刑名旣不能秉公料理錢糧何能徹底清查所具清單
朕總未覽一字

陝西蘭州按察使臣李元英謹

奏為恭繳

硃批事竊臣質本庸愚才復駑鈍荷蒙我

皇上天恩遇事教誡雖以臣犬馬無知亦覺深自省悟

臣前奏撥估兵糧并人丁歸併二事復蒙

聖訓諄切臣跪讀再三仰邀

天地之恩愈切悚惶之念自今以後惟有益勵初心奮勉辦事斷不敢始勤終怠有負

高厚洪恩所有奉到

硃批理合恭繳謹

奏

恩已負矣何云不敢有負此皆積陰功賣法徇私之報應不知爾將如何底止也

硃批諭旨卷七十九

欽定四庫全書

硃批諭旨卷八十

硃批趙弘本奏摺

雍正六年二月二十六日雲南按察使

臣

趙弘本

謹

奏為恭謝

天恩叩請

聖訓事

臣

於雍正六年二月初八日接奉部文知照奉

旨雲南按察使員缺著貴東道趙弘本補授欽此臣聞
命之下隨恭設香案望

闕叩謝

天恩卽具詳署貴州巡撫祖秉圭特疏代

題訖伏思

臣

一介菲材至愚極陋由江寧府同知歷

陞至雲南按察使

聖恩浩蕩感激難名卽捐糜頂踵不足以仰報

殊恩但滇南為邊疆要地臬司為刑名總匯職任綦重

臣才庸識淺惴惴難安叩請

聖訓指示官方俾臣得以遵守竭盡駑駘矢公矢慎庶

無負

皇上簡畀洪恩於萬一耳謹

奏

但能矢公矢慎朕更有何訓示耶勉之勉之鄂爾泰可
為封疆大臣之標準爾為屬員若能法其居心之半則
一生用之不盡矣

雍正七年六月十九日貴州按察使臣趙弘本謹

奏為請禁書吏抽改案件之弊以清吏治事竊臣前

歷任各省多有蠹書姦吏抽改案件之弊為害匪

輕臣叨蒙

聖恩陞授雲南按察使每遇接見屬員之際莫不諄諄

以此告誡今更蒙

恩將臣調補貴州按察使伏思臬司一官為刑名總匯

其中有釐姦剔弊之處須殫心籌畫方為有益查

民間詞訟控告到官一經批斷則事經立案官備稽查原以昭

功令而清案牘乃有一種蠹書姦吏往往與訟棍刁民串通作弊或乘官更更代之際將已未審結案卷內有要緊批詞詳文看語任意抽換刪改甚至並將全案藏匿使接任官無卷可稽以便棍徒翻控輾轉拖累臣請嗣後令直隸各省有司於每房書吏各給印簿二本分註已未完結將一應

欽部案件以及批發自理各項卷宗註明某年月日
奉批某件准理某件逐細登明已結者將案內要
緊批飭看斷摘錄某事之下毋許洗補潦草以杜
改換增減之弊其未結之案另行分析註明不時
稟閱以便按期審結每於新舊交代之時卽將此
號簿案件並入交代冊內加結轉詳該上司以便
日後稽查抑臣更有請者姦胥多於正署交代之
際凡遇前官任內有限期將屆案件勢必詳叅遲

延彼因受賄囑則朦隱延擱及限期已逾惟官羅
叅處而彼則優游事外臣請嗣後凡有逾限案件
除該管官照例叅處外其經承書吏如有朦擱以
及受賄抽匿改換等弊照例加等治罪如此不惟
書吏知儆而吏治益清矣謹

奏

該部議奏

同日又

奏竊臣蒙

皇上隆恩司臬滇黔清查各案見兩省事件仇殺刦擄

命盜等案多由外結至督

臣

鄂爾泰莅任以來區

畫周詳凡有大案始行詳報無如各州縣故習因

循未能盡行振肅提查原案往往不全甚有并原

案俱無者總由舞文之吏暗通訟棍抽換文書久

成積習若此弊得除不但各衙門案卷易於清理

而盤踞之積蠹其伎倆自無所施矣又

臣

歷任各

省恭遇

萬壽聖節元旦冬至等日行禮坐班所見儀注不一往往僭越不倫卽上司屬員於公處接見亦無一定之規以致體統全無凡此相沿之陋習皆當仰邀乾斷勅部嚴定處分者也以上二事各具摺奏

聞外鹽政諸務亦經繕摺條奏但摺內只言其官買餘鹽以杜販私之弊而其中尚有相因可行之事如海邊范堤外之地與高寶興泰之湖田皆可徐議

開墾者也范堤向時近海目今自堤至海有遠至數十里及一二百里者其南至江口北至黃河中
間延袤千里之遠棄為斥鹵者久矣竈戶從前俱
在范堤以內近日遷移近海其舊時場竈之地並
為人所侵占而堤外沙地更無人墾種總因販私
之利過於力作而外地棍徒勾引為匪以致農民
不務本業相習成風其高寶興泰一帶地處卑下
湖水漲發便有淹沒之患卽雨水稍多往往浸漫

為憂有妨耕作其間居民借水患為名公然以私
販為業皆由於近海之射利既多而民頑所以土
曠也臣近因在滇署理驛鹽道印務親見督臣鄂
爾泰就各井竈定買餘鹽之法裕課杜私行之有
效因思兩淮場竈若照滇井所行經營課帑可十
倍於滇省況餘鹽既歸官買則販私之弊自然永
絕頑梗之民無所爭利而董勸可施勢必盡歸於
力農勤作則久荒之地土無不開墾矣至於官收

官賣之鹽觔自場竈運至州縣必須舟楫細查河
身故道疏通開濬以利搬運而高寶興泰之水藉
此相度以洩其勢凡水之就下者莫不直達於海
則久淤之湖田不但免常澇之患竟成膏腴之產
卽涸出之地畝又可開墾以成田矣但事關重大
其中原委尚須面行陳

奏如以臣言可採求

命臣引

見其中先後緩急理財用人凡一切事宜皆得以盡其
所欲陳尚有歷任數省所見利弊俱可竭臣愚衷
以敬陳始末為此繕摺謹

奏

亟當努力效法鄂爾泰之居心本領才情原不可勉強
此衷則何難效法之耶凡人莫不各具識見率因根本
處立心差謬故一切智力皆汨沒不能發露偶遇一二
事機理稍契又非過則不及所以諸凡作用祇覺智力

不逮殊不知於根本工夫未到也但得本何愁末勉之
條奏三摺留中內如鹽務一款江省之利弊豈止於此
不得其人饒多良法美政何由施設若得實心任事明
體達用之臣地方上類斯諸務自應思及其謀猷方畧
未必不勝汝之所奏也直省一切吏治大抵皆然引見
面奏徒付空言亦復何益除非命汝親往經理試行所
言但朕於汝之立身行己尚信不及命汝司臬滇黔原
欲令汝親近鄂爾泰熟悉其居心行事庶幾觀感奮勉

國家將來得一可用之人今江蘇正在清查新舊錢糧
案件大吏亦何暇兼顧此舉姑將汝所奏與該督撫商
酌看再抽改案卷一摺朕覽之頗覺有理祇恐繁碎難
行現發廷議又嚴肅儀注一奏甚是但若遇謹飭守禮
上司不待朕諭自能整肅若遇放蕩不檢之輩卽逐細
注定典則亦不過視為片紙虛文耳朝廷殿陛之間設
立御史正色糾察尚有失儀者何況頒行一篇儀注而
欲其必不陽奉陰違得乎且此非吏治民生之要務國

家體統尊嚴不專在此果能大法小廉紀綱井井內外
臣工皆實心奉公絕欺蔽恥容默法令必行恩膏下逮
四海黎庶無不心悅誠服如此殊勝徒然外貌恭敬也
然亦不可置之不講此奏朕酌量有諭但不以為要務
耳嗣後汝再有奏摺交大學士張廷玉處為汝轉奏特
諭

同日又

奏為報明事竊查貴州地方今春雨暘時若春花大

熟所有大麥小麥蕎麥燕麥菜子蠶豆豌豆等項
現據各府州縣報稱春收九分十分不等目下稻
田又已盡行栽插秋禾俱各秀發豐年有兆民情
欣悅又臣曾任滇省往來之人不時詢問俱云雲
南春收頗好雷鳴田徧行栽插秧苗秀發亦有豐
年之慶再臣上年恭遇

萬壽聖節親見慶雲昭回既知廣南府三環映日之祥
近聞雲南府五雲捧日之瑞此皆由我

皇上勤民至意感召

天和庥徵屢見是以頑梗之苗疆旣撫則師徒無事雷行
未疏之水道將通則商賈自然雲集滇黔兩省愈
見物阜民安時和歲稔誠永永無疆矣臣親見嘉
祥不勝懼忭合據實奏

聞謹

奏

聞奏深慰朕懷滇黔地方得鄂爾泰如此公正廉明之

臣忠誠任事實力宣猷自然感召

天和斯乃一定之理也

硃批諭旨卷八十

欽定四庫全書

硃批諭旨卷八十一

硃批岳超龍奏摺

雍正六年四月十五日直隸天津總兵官臣岳超

龍謹

奏為奏

聞事竊臣自抵任天津惟有恪遵

聖訓釐剔弊端以仰報

高厚於萬一今查明天津總兵衙門向有陋弊臣不敢欺隱敬為我

皇上陳之

一各營公費糧有六七八分不等原為添製旗械火藥等項公用今查各營在公項動用者無幾大半皆係供應總兵衙門之用臣通飭各協營嗣後公費止許於公項內動用令其按季造報臣衙門查核如有非關營伍之事擅動公費者即行指名

甚是

糾叅

好

一各協營路每年與臣衙門書辦規禮銀二百餘兩又拔補千把總每一員與臣衙門書辦及各項人役規禮銀三十餘兩四十兩不等臣俱逐一查明嚴行禁革

一總兵衙門書辦及標下各協營書辦旗隊等除本身糧一分之外俱有多食貼糧一分二分不等臣查伊等有催漕出差遊巡往返盤費現在咨商

提臣楊鯤酌量畧為留給其餘多食貼糧飭令各
斟酌為之

營概行募補

一鹽商每年與臣衙門書辦飯銀二百八十八兩

臣查此項相沿已久今書辦各項陋弊俱已禁革
此論是當之極

若將此項飯銀再行革除用度實屬艱難臣再四

思維將此項飯銀或仍留分賞各書辦作養育家

口之需可否賞給出自

聖恩

一總兵衙門除鹽規之外尚有鹽商每年餽送節禮銀二百兩臣荷蒙

皇上隆恩將鹽規銀二千六百兩賞臣養廉何敢又受節禮因思臣標兩營鎗手兵丁仰沐

聖恩在公費內製造火藥賞給操演惟弓箭兵丁二百名自行購備每箭五枝價銀四五錢不等亦屬艱

難仰懇

在汝量力自為也

天恩將此項節禮銀兩每年造箭賞給弓箭兵丁俾得

勤加習射庶與鎗手兵丁一視同仁均沐

浩蕩洪恩於無旣矣臣芻蕘之見是否有當伏乞

皇上批示遵行謹

奏

初到任之奏即能如此明白妥協者少朕實嘉悅覽焉
勉之勉之

同日又

奏為恭報雨澤事竊查天津地方入春以來雨水稀

少臣於四月初六日前往大沽查閱海口一路見
麥苗亢旱臣回署即會同鹽臣鄭禪寶及闔城文
武於初九日設壇步行祈禱仰賴

皇上洪福於十二日亥時起至十三日丑時止下雨五
指所有得雨日時理合具摺奏

聞謹

奏

今歲春雨各處俱報霑足京中亦稱雨暘時若不料天

津相隔咫尺乃竟亢旱覽奏得雨日期甚慰朕懷但託朕洪福一語殊不以為然倘爾等文武大員不能令兵民輯睦刑賞允當恪秉公誠以迓

天庥而徒仰仗朕之洪福雖步行祈禱亦恐未必即有感應也惟捨末務本則其應如響蓋

上天神明所喜者只一是字天人不過一理而已知此更當加勉自勵

雍正六年十月十三日署理湖廣提督臣岳超龍

謹

奏為奏

聞事竊臣

陞辭就道於十月初十日已抵常德府擬於十一日任
事先於初九日途次接准署提臣劉世明揭帖內
開現在奉

旨辦理派撥遣往貴州兵馬若即交印誠恐難於調遣
已

劉世明於此一事

可嘉之至

卷八十一

題明暫行留用又咨稱蒙兵部劄付奉

旨湖南所派官弁兵丁俱著揀選賢能精壯者命往并
多給口糧令其速行起身岳超龍甫到新任於人材
尚未深悉其選派弁兵之處著劉世明辦理俟官兵
起身之後再赴甘肅巡撫之任再著該提督巡撫預
派兵丁一千名聽候調遣欽此又部文內開奉

旨此事著劉世明辦理俟岳超龍到時如有未完事件
岳超龍即行承辦斷不可遲誤欽此仰見我

皇上睿慮周詳

聖謨廣運臣祇領欽遵查派撥赴黔官兵業經劉世明揀選派定外其預派聽候調遣之兵丁亦當早為選派庶免臨期遲誤臣雖未接印理難坐視凡有

好

關軍務自應與劉世明協同辦理臣隨面加商酌將此預派兵丁一千名會同派定先期行文各營預備聽候調遣俟赴黔官兵起身臣接印後所有應行事宜次第舉行合將微臣到常日期並協辦

軍務情由繕摺奏

聞謹

奏

覽奏知道了

雍正六年十一月二十四日署理湖廣提督臣岳

超龍謹

奏為奏

聞事雍正六年十一月二十三日准雲貴督臣鄂爾泰

咨開准兵部咨奉

上諭著將湖南附近貴州之營兵派撥一千名前往貴州聽候調遣荊州駐防兵預撥一千名前往常德府駐劄再預撥兵一千名聽候調遣此實

聖謨弘遠動出萬全為粵西兇獍正在會剿故也今廣西八達事竣早已回師古州八萬地方雖附近黎平界連楚省而彼處生苗業經歸附寧帖並無違抗今現在敢拒官兵者惟凱里屬之丹江一路計

黔省調往丹江軍前兵已滿六千餘衆留防進取
皆已敷用湖南已發之官兵一千名諒必附近撥
來自應暫駐黔界遙為聲勢用則速調不用即當
遣回至所預備之駐防兵與綠旗兵各一千名似
可無庸續發致煩遠涉相應移知等因到臣臣查
前派官兵一千名於十一月初三日起程赴黔業
經

題報在案至於預派兵丁一千名前奉

諭旨會同選派預備聽候調遣今督臣鄂爾泰咨內雖稱無庸續發但係奉

旨選派之兵臣仍照舊預備不敢稍懈恭候

諭旨遵行為此繕摺奏

聞伏乞

皇上睿鑒施行謹

奏

朕原有旨此番軍務悉聽鄂爾泰調遣當一一照依該

督所咨而行一面將前項情由具題并咨明該部可也

雍正七年正月二十六日署理湖廣提督臣岳超

龍謹

奏為請

旨預簡人員以備委署以免懸曠事竊臣查楚省各營

副叅遊都守備等官一遇陞遷事故開缺其新任

之員必經數月之久始得抵楚雖委員署理未免

顧此失彼且查永順保靖桑植新經改土歸流貼

防巡哨在在需員料理臣不揣冒昧懇請

皇上於侍衛及留京年滿千總內各揀選數員發交督
臣邁柱如遇副叅缺出則於現任遊擊都司內選
擇署理其遊都本任即將奉

命來楚之員委署如遇遊都守備缺出則將侍衛及年
滿千總令督臣以相當之缺酌量具

題請

旨補授庶要地不致懸缺待人而任事者亦無鞭長莫

及之慮矣再查湖北湖南督撫兩標原有分發武
進士五名內除李庚臨委署均州營守備外尚有
四名未經委用但恐新進之員於營伍未必即能
熟諳臣請嗣後如遇緊要守備員缺將年滿千總
委署

題補其平易之缺將武進士內效力勤謹者委署試
用如果諳練稱職再行

題請補授臣因營伍地方起見可否

俞允出自

聖恩為此謹

奏

怡親王會同兵部確議具奏

同日又

奏為再懇

天恩續發教習以益水汛事竊照湖廣水師巡查長江

洞庭各路最為緊要臣自到任以來稽查水師各

營詢其往來進退之法以及行使撐駕之方實未能熟練前蒙

聖恩敕令揀選福建水師兵丁五十名到楚補伍教習
仰見我

皇上睿慮精詳無微不至但查水師七營共
兵三千餘名以臣愚見若得教習百名分撥各營
於訓練倍加有益合無仰懇

聖恩敕下福建水師提臣再為揀選五十名連前共一

百名分撥七營則傳授不難於周遍而學習者自易於見功從此舟師精練水汛肅清部伍商民均

沾

聖澤於萬年矣臣謹繕摺具

奏伏乞

皇上睿鑒施行謹

奏

此所奏是該部議行

同日又

奏為奏

聞事竊臣查常德地方上年自十月以後天氣晴和麥
豆雜糧栽種遍滿至十二月內連得大雪交春以
來雨澤霑足臣遣人四鄉查看麥豆雜糧等項俱
各十分生發極其豐茂現在米糧價值亦平兵民
安和地方寧謐臣謹據實奏

聞謹

奏

據奏麥豆俱各豐茂朕懷深慰然必待收成後方敢以
為信然也

雍正七年四月二十六日署理湖廣提督臣岳超
龍謹

奏為檢舉事竊臣前於直隸張家口副將任內保舉
浙江金華副將羅俊辦事勤敏操守廉潔正直剛
方堪備任用繕具密摺奏

聞今臣接閱邸抄奉

旨聞得浙江金華副將羅俊為人輕浮料理營務亦屬
平常著來京爾部請旨欽此臣聞

命自天愧悚無地伏念臣質本庸愚知識淺陋因羅俊
前任張家口叅將與臣同城一載臣見其廉潔剛
方遂即具摺保舉今不意羅俊在浙為人輕浮而
又疎懈營務則從前臣之失於詳慎冒昧之罪實
所難辭理合據實檢舉伏乞

皇上敕部將臣嚴加議處以為薦舉不得其人之戒為

此具摺奏

聞臣不勝慚愧悚慄之至謹

奏

羅俊人原平常而且孟浪非至浙江方始輕躁疎懈也
前因林祖成破格舉薦所以不次擢用朕目中實未見
其有可取處汝之保舉大誤矣但初非因汝所保而用
今何可議處汝耶

同日又

奏為奏

聞事竊查常德地方本年二三月間時有微雨但未得十分霑足正在望雨之際於四月初七八并十六七等日連降時雨低田得水停蓄禾稻俱已栽完及交小滿節氣大沛甘霖目今高田亦俱布種再查二麥均已登場收成約有九分至於米穀價值亦屬中平不致昂貴臣謹據實奏

聞謹

奏

覽奏知道了

所奏新經改流頑苗辱官一摺留中另有諭旨

雍正七年五月初四日署理湖廣提督臣岳超龍

謹

奏為奏

聞事竊查永順土民聚衆一案實因土人賦性蠢頑同

知潘果撫綏無術以致譟聚妄行經臣差委中軍
叅將趙秉鐸前往宣布

皇仁曉以

國法該土衆聽聞之頃莫不幡然悔悟感化輸誠俱
已陸續解散安業訖但永順旣經改流該同知潘
果如有縱蠹殃民實蹟受害土民應赴該管辰沅
靖道衙門控愬何得擅聚多人圍署捉役此中必
有二三姦惡為首之人煽惑鼓釁雖目前業已解

是

散但不查拏按律究擬誠恐刁風漸長日後土苗
不無效尤除現在咨移督撫飭令地方官查明為
好首起事之人是何姓名臣再會商設法密拏務期
獲解究擬以伸

國法以儆刁頑外所有永順土衆解散寧帖情由理
合繕摺奏

聞伏乞

皇上睿鑒施行謹

奏

此案確係潘果庸劣之所致朕已有旨差大臣前往審
理蠢頑土人刁風固不可長地方劣員敗檢溺職之風
又可長乎審明後朕自有懲處之道

雍正七年七月初八日署理湖廣提督臣岳超龍
謹

奏為奏

聞事竊查永順土民聚衆一案經臣具摺

奏明蒙我

皇上欽差署理湖北撫臣趙弘恩等會同審理其土民控告款蹟應聽

欽差提訊但土人聚眾妄行所有鼓釁首惡自應查出治罪臣當咨移鎮草鎮臣周一德就近調度設法密拏誠恐查拏之日首惡不無驚竄隨又差臣標遊擊星馳前往與永順副將協同料理去後茲據該副將等呈報本年七月初四日卑職等會同署

永順同知白豐將土民背聚案內殺牛吃血為首
起釁之人彭弘耀田爾根等二十三名已經擒獲
當押赴辰州府交收理合呈報等情前來臣查此
案為首起釁之人據報雖已擒拏押解但未經訊
供尚難懸定應俟

欽差到日審明定擬臣猶恐實在倡首姦徒或有聞風
潛匿之處亦未可定除檄行該將等再加密查確
實毋致漏網亦不得株連無辜外所有拏獲永順

土民聚衆各犯緣由理合繕摺具

奏伏乞

皇上睿鑒施行謹

奏

此事一切料理處皆屬孟浪不妥俟欽差審明之日自有分曉

同日又

奏為恭謝

天恩事雍正七年六月初十日臣標把總齋捧

皇上硃批奏摺併

御賜紫金錠一匣到臣當即恭設香案望

闕叩首祇領伏念臣一介庸愚謬膺封疆重任寸長未
效慚悚方深今復蒙

聖恩賜臣以

內府秘製之佳品臣惟有益思正已率屬砥礪官方
以仰報

高厚之恩於萬一耳理合恭摺

奏謝伏祈

皇上睿鑒謹

奏

據奏正已率屬等語言之易行之難朕不輕許汝也即使竟能盡此四字若不知訓練兵丁滌除陋習不過自了一身而已與木偶何異曠職之愆仍不能免向來湖廣標卒驕悍不法已久加之魏經國一味姑息以市恩

邀譽廢壞至不堪問矣即馮允中亦只因循將就並未著力整頓後經劉世明莅任數月甚為改觀因閩撫要缺不得其人隨又將伊調補朕於此任深望汝竭力革除舊弊今觀於一切辦理併採訪奏報等處甚不及劉世明似此虛負倚任不肯實力整飭營伍教誡兵丁滌除陋習恐非自全之術報恩之道也當深思之

同日又

奏為奏

聞事竊查常德地方四五月間正在望雨之際得沛甘霖禾苗均已布種惟自六月初旬天氣亢暘頗艱雨澤臣率同地方文武員弁虔誠祈禱無如一月以來甘霖未降其有塘堰之田尚堪厚灌者收穫可望六七分至傍山高田以及平田無水可厚之處稻禾就槁將來僅可補種蕎粟至現在米價每倉石八錢五分以至九錢不等因夏麥豐收是以不致昂貴臣謹據實奏

聞謹

奏

楚省兵民刁悍成風文武大吏皆不肯實心任事馴至有司畏民將弁畏兵吏治營務之不妥協處莫可枚舉似此冠履錯謬是非顛倒以至水旱頻仍乃自然之理守封疆者咸係此等居心率同一類文武員弁偽事祈禱豈但彌月不能上格即其間幸蒙

天恩大沛甘澤朕謂斷非汝輩忠誠感召之所致也假若

讀朕訓諭凜惕自反省過悔愆洗盡私腸實心實力整理地方能令兵民改易舊習獲免

上天之所譴罰則從茲五風十雨歲歲豐登朕可保其定然不爽不此之務而徒以外像儀文設壇建醮祈禱為事恐

天地神明未肯被汝輩不忠不誠凡夫俗子之所欺誑也當與同事諸臣共相奮勉益加敬慎以講求探本尋源之道為要

雍正七年八月十二日署理湖廣提督臣岳超龍

謹

奏為

聖恩高厚訓諭殷諄微臣感激難名愧悔無地敬抒奮
勵悛改之下忱仰祈

睿鑒事雍正七年閏七月二十六日臣標把總齋捧
硃批奏摺到常臣跪讀

訓旨開導臣愚悚慄慚懼莫知所措迴環尋繹口誦心

維仰見我

皇上至仁如天所以矜憐而訓誨臣者無一不切中臣之隱微無一不深入臣之肺腑臣雖頂踵捐糜實莫能仰酬於萬一也臣一介庸陋荷蒙

皇上天恩擢居總兵之職復奉

命署理提篆適當魏經國馮允中因循廢弛之後經劉

世明整理改觀凡營伍中尚有未盡之陋弊臣自

革除

陋弊猶為細事

訓誡兵丁斯為最要何乃不分輕

應竭力革除訓誡兵丁使之日有起色庶幾稍稱

重而

言之耶

厥職乃臣識短才疎不知著力整頓尸素溺職罪

無可追茲蒙

皇上格外矜全不即擯斥

賜以訓誨臣伏讀之下汗流浹背感激涕零竊念臣舉家受

恩至深至重仰承

訓示至切至明自今以後惟有洗心滌慮探本尋源恪遵

聖訓實力整飭以贖前愆臣若再不猛省深思痛改則是下愚不移負

恩莫大不但

國法有加倍治罪之條即

神明亦難宥臣之冥頑怙過也所有微臣感激愧悔緣由理合繕摺恭謝

天恩伏祈

睿鑒謹

奏

若不痛加策勵不但非人亦何顏見汝姪岳鍾琪也勉之

同日又

奏為奏

聞事竊查常德地方本年六月內雨澤稀少經臣具摺奏明今自七月以後雨水調勻霑足所種雜糧蕎麥等項甚是茂盛九月初間皆可全收現在米價平

減上米每石八錢五六分中米七錢六七分不等
兵民樂業地方寧謐理合據實奏

聞謹

奏

今歲統計直省而論惟湖南報旱尚何顏具奏兵民樂
業之語耶

雍正七年九月初七日署理湖廣提督臣岳超龍
謹

奏為奏

聞事竊查常德地方入秋以來雨水霑足雜糧甚是豐
收經臣繕摺具

奏當此秋成之際臣差查通省各州縣收成約有八
九十分不等惟湖南之澧州臨湘華容安鄉石門
等近山少水之田禾稻收成歉薄其有水車戽之
田俱有六七分至湖北之荊門州孝感雲夢崇陽
通城大冶等縣雨澤稍覺愆期稻禾收成五六分

不等臣思湖北湖南兩省地方俱皆豐稔而有此
數州縣未登大有實由臣等奉職多愆不能感召
天和之所致惟有實心修省敬謹奮勉以冀

上天垂佑至於通省入秋雨澤甚調雜糧豐熟各處米價
俱平地方安靜兵民樂業臣謹據實奏

聞謹

奏

朕為年歲雨水屢有嚴諭蓋欲汝等文武大員秉公持

正整理地方化導兵民返樸還醇感蒙

上天許一是字召和氣以致佳祥之意非欲汝等匿災諱
肯增減捏飾以寬慰朕懷也倘或錯會朕意誤事更為
不輕戒之慎之誠之一字事事時時不可暫離此為最
要

同日又

奏為敬陳苗疆要鎮之情形請改隸兼轄營分以資
調遣以壯聲援事竊查湖南永州一鎮界連兩粵

深林密菁最易藏姦更兼逼近苗徭防範尤湏嚴
密該鎮只有本標三營額兵一千五百餘名分布
水陸塘汛二百餘處存城兵丁無幾設遇緊急並
無兼轄外營可資調遣形勢殊為單弱臣查臨藍
宜柳兩桂三營環列永州東南境壤相接但此三
營俱屬臣衙門管轄與永鎮不相統攝雖鄰境有
事無分此疆彼界然既係隔屬難免呼應不靈且
此三營距常德皆千有餘里而與永州相去甚近

臣愚請將臨藍宜柳兩桂三營將弁並額兵一千八百餘名俱令就近附永州總兵官兼轄不但該鎮有此三營得以資其調遣而臨藍等營與鎮標一氣聯絡更可互為聲援其於巖疆營制汛防均有裨益矣臣言是否可採伏乞

皇上睿鑒批示遵行謹

奏

所奏候發廷臣議覆凡如此等地方營制事宜俱當會

商督臣奏請為是今汝據一己之見而言諒廷臣亦未必遽定可否仍議詢問該督徒勞往返耽延時日殊屬不達事機

同日又

奏為請

旨再申黃銅之禁以裕泉源以杜流弊事竊查民間擅用黃銅器皿有妨鼓鑄甚且姦徒銷錢作器以致錢價多昂上厪

宸衷籌慮特頒

諭旨惟一品官員之家器皿許用黃銅餘著通行禁止

此實我

皇上優異大臣之

聖心凡屬臣工莫不共知感激但查器皿之中凡紅白

青銅以及鐵錫甕器木器皆可供用即一品官員

家常日用之物亦並無必需黃銅之處況一品人

此論非也原旨但令一品之家免其交官未曾許其另
員每有已分家之兄弟子姪亦皆託名藉口公然

再製買有何影射之處黃銅之未禁絕緣汝等地方文
濫用甚而打造銅器之姦匠亦復假借影射以為
武不實力奉行之故耳與一品之家用與不用何涉
尚有一品之家可以使用製造私賣之弊多由此
而生臣不揣愚昧懇請

敕部通行嚴禁凡一品官員之家所有黃銅器皿悉令

繳出嗣後槩不得私用則姦匠已知無可藏蓄消

殊屬可笑之論

售之處自必不肯違禁私造黃銅悉得繳官將泉

源日裕流弊不杜而自除矣臣因裨益鼓鑄有關

國計民生敬獻芻蕘是否有當伏乞

皇上睿鑒施行謹

奏

即一品之家槩令繳官一體嚴禁亦未嘗不可但為期尚早俟收買數日奏齊之日朕再酌定

雍正七年十一月十六日署理湖廣提督臣岳超

龍謹

奏為欽奉

上諭事竊查臣標兵丁蒙我

皇上賞給帑銀一萬二千兩永遠存公營運生息以資
惠濟

隆恩曠典亘古未有闔標兵丁感激下情經臣繕疏代
題在案續據湖南布政司委員解送銀兩到常臣與
臣標將備公同詳議據臣標中軍叅將趙秉鐸等
呈稱查常郡人煙輻輳惟有開設典當舖運生息
堪垂永久隨招募商人二名徐旭豫吳榮宗承領
營運開張當舖併取有該商承認結狀前來臣思

開設典當通融周急不但無占奪百姓行業之處
且以紓民間之偶乏洵屬可行隨即批飭取具該
商的實保結存案併飭令各將備輪流稽查出入
確數前後接替交代臣仍不時詳加查核以杜侵
那等弊其生息銀兩俟豐裕之日再為酌定惠濟
之數另行具

奏所有微臣遵奉辦理緣由除呈報戶部兵部外臣
謹具摺奏

聞謹

奏

此事料理甚屬妥協

同日又

奏為奏

聞事竊臣查湖南地方風俗最為愚悍蒙我

皇上仁育義正聲教誕敷屢頒

諭旨諄切訓誡莫不感動天良同心向善即如臣駐劄

常德府城有該學武生尹大卜於雍正四年間有江南揚州客民朱武臣借大卜房屋寄貯白蠟三千斤約值價銀六百兩未經取去至雍正七年間尹大卜聞朱武臣物故因訪問江楚兩地俱無武臣的屬大卜即具呈請將白蠟歸官變價修葺學宮以永垂朱武臣之名等情經該地方官查明通報在案又常德府河街地方商人汪詩桂於雍正七年八月間將銀五百兩託交船戶王起貴帶至

漢口於九月過洞庭湖將近君山地方遭風覆舟
一切行李盡被沉失起貴飄流登岸隨將沉失託
寄銀兩緣由告知山僧一如及其徒樸園代為打
撈至九月二十九日撈獲原銀僧一如即遣徒樸
園遠涉大湖到常送還汪詩桂隨酬銀五十兩樸
園堅辭不受而去當有岳州士民及常德商人各
自具呈該地方官通報在案又常德府屬之桃源
縣給頂武生張應登於雍正七年十月十五日路

拾遺銀二封共九兩四錢四顧無人只得攜歸次日遍貼招字招主認還隨有潯洋坪民人郭玉培遺失銀兩赴應登之家細說錠件相符立即付還郭玉培堅請平分張應登固辭不受玉培感泣赴官稟明亦經地方官查實通報在案此皆我

皇上至誠感孚風移俗易凡有澆漓之習皆成道義之鄉其應否請旌之處統聽撫臣核明具

題臣現住常德目擊親聞不勝欣幸之至理合據實

奏

聞謹

奏

此非湖南風移俗易之效湖南官弁兵民之惡習不在
於此也汝為楚省總帥能將已之一身勉力移易則營
伍兵丁自然傾心率服即如督撫大吏若不能自勉遷
改焉望屬員之景從百姓之於變耶此奏所謂不揣其
本而齊其末方寸之木可使高於岑樓一二人之賢何

能掩千百人之不肖爾意朕殊不取

同日又

奏為奏

聞事竊

臣

於上年冬間接彛陵鎮

臣

杜森密字據該標

守備喻天柱密稟有探聞容美土司田旻如刑法

嚴刻及派徵硝斤霜降合操衝打過隊且於五峯

司地方宰殺牛馬叫衆人對神盟誓都要同心扶

助等語字寄到臣臣隨密札鎮臣惟宜整頓操防

切勿張皇漏洩以致激生事端去後續接鎮臣來
字內云據差探兵丁回彞備稱容美土司畏懼

功令不敢恣意殘刻至於合操設誓徵徭等事原係
該土司舊例並無別故等語是以臣未敢瀆奏

天聽今於本年閏七月內准鎮臣杜森咨報容美土司
於七月間有遣差強逼四川建始縣民人進司居
住之事臣當即咨移該鎮確查并咨移督臣邁柱
會飭去後續准該鎮覆稱行據該標後營遊擊准

四川夔州府移開該土司驅入建始縣屬地名革
潭壩居民四戶李家壩居民一戶又下白沙粟穀
壩金麗堂等處居民五十三戶亦被驚散現在招
集安插等情又據容美司申稱本司於六月內奉
督部院委荊州道轉傳

諭旨詳悉曉諭勿得私授川民剗付徵收春花二絲本
司感戴

皇上原情弘貸之恩凡有非禮越分之事已悉改除謹

守法度將土衆撤回其所有置買田產聽院區畫
並出示不復收納絲花等件至所撤粟穀壩革潭
壩等戶係本司佃戶世籍土軍土民實非川省及
本省漢民其下白沙之民並未遣令移進土司境
內等情一併咨覆到臣臣查夔州府所報與該土
司所稱彼此不符現在督臣邁柱會同臣咨移川
省撫提各委員會勘查審統俟查明詳覆到日該
土司果有恣縱不法情事臣當與邁柱會同詳酌

另繕密摺具

奏外為此繕摺奏

聞謹

奏

田畹如之心跡朕所悉知方將感恩戴德不暇豈尚有不法之行為此皆不知大體武臣起好大喜功之念復貪羨容美富庶而懷圖利之心所以議論紛紛何得輕信妄生事端耶朕諭總督邁柱之旨甚悉汝但一聽邁

柱指揮而行不必稍動多事之想

雍正七年十二月十五日署理湖廣提督臣岳超

龍謹

奏為奏

聞事竊臣於雍正七年八月內據湖南衡州副將崔起
潛報稱查得雍正五年間發遣廣西犯人達色馬
守柱蔡登科耿桑格六格太監吳守義霍成各案
之押解弁兵張文禮陳慎等奉巡撫并准臬司密

行檄調於本年閏七月二十二日起程前赴臬司
查訊轉送撫院覆訊等情到臣臣查發遣廣西人
犯達色等心懷怨望在外捏造悖逆之言沿途布
散所有押解弁兵人等諒撫臣王國棟自能開導
根究得其實情迨至十一月內臣恭讀

諭旨始知王國棟並未查出一人一語臣隨密調弁兵
張文禮等至常逐名親加訊問反覆開導已據將
犯人達色等捏造誣謗之言歷歷供吐至訊其當

日撫臬衙門訊問之時何以不即供出據稱按察
司傳訊之時原未曾細問千總等一時記憶不清
是以含糊答應及至撫院覆訊亦即照前回答今
蒙細訊緩緩默想方纔記起等語據此除將弁兵
等所供另摺鈔錄恭呈

御覽外理合繕摺奏

聞伏乞

皇上睿鑒施行謹

奏

愈見不堪四字外無可批諭總之湖廣之吏治戎政文武大臣無一可取者再若不知愧勉仍復悠悠從事苟且塞責以尸位竊祿恐非長久之計也

雍正八年三月初一日署理湖廣提督臣岳超龍
謹

奏為凜遵

聖訓敬慎奮勉披瀝惻忱仰祈

睿鑒事竊臣一介庸愚荷蒙

皇上天恩擢授總兵復

命署理提篆力微任重時切蚊負之虞臣自任事以來

體察楚省營伍原屬寬縱廢弛及經劉世明力加

整頓漸覺改觀惟因廢弛已久尚未能遽有成效

是以臣節次檄飭各屬整肅營務勤加訓練務令

技藝優嫻軍裝整備併嚴緊汛防革除陋弊凡調

驗將備弁員無不諄切告誡期於共矢精白以報

我

皇上天高地厚之恩但臣材質駑鈍知識短淺惟有凜遵

聖主明訓努力奮勉敬慎奉行斷不敢因循苟且悠忽

偷安倘臣有一念負

如此言者甚多行符其言者甚少恩必為人類之所不齒覆載之所不容伏冀

聖慈俯垂矜宥時

賜訓旨開導臣愚俾得稍免隕越臣有生之年皆戴

恩之日矣臣曷勝感激愧赧之至謹披瀝下忱仰祈
皇上睿鑒所有奉到

硃批奏摺合併恭繳謹

奏

誠於中必形於外莫務空言但勉實行果有實行朕自
得知勉之

雍正八年十月初三日湖廣提督臣岳超龍謹

奏為奏

聞事竊臣於雍正八年九月二十九日接准貴州提臣
楊天縱咨開照得烏蒙逆夷悖叛業經遣發滇黔
大兵分路撲剿並咨川省發兵會合剿除務盡根
株以申

國法查貴州威寧大定畢赤黔西四協營地方接近
烏蒙鎮雄最關緊要該協營出師古州等處官兵
亟宜調回防範至於苗疆尚有未帖服之處亦須
多兵彈壓今雖現有粵兵貼防但地方遼濶猶需

鄰兵協守合亟專差馳請希於附近黔省營路迅
發官兵一千五百名前赴鎮遠聽候古州鎮分布
彈壓等因到臣臣查古州等處係新撫苗疆密邇
黎平鎮遠與湖南之靖州沅州接壤甚關緊要隨
即派撥臣標并湖南撫標及各協營兵丁共一千
五百名令副將何勉叅將張霍帶領備弁兵丁一
千名由辰沅一路前至鎮遠駐劄又飭叅將毋椿
齡帶領備弁兵丁五百名由靖州黎平直抵古州

均聽鎮臣蘇大有調度一面飛咨湖南撫臣趙弘
恩檄飭沿途有司料理口糧草豆以及運送軍裝
礮位人夫一俟料理齊備即使起程前往臣再另
疏密

題外所有派撥官兵前赴黔省鎮遠古州緣由理合
先為奏

聞至楚屬接連黔省苗疆臣已密飭各營將弁嚴加防
範合併陳明謹

奏

料理甚屬可嘉所奏知道了

雍正八年十二月二十七日湖廣提督臣岳超龍
謹

奏為奏

聞事雍正八年十二月十八日接辰永靖道王柔密札
內稱本月十二日據米叻千總趙國棟稟稱探得
貴州坡西卡羅地方所設汛兵三十名被該地苗

人聚集千餘人將兵丁盡行拏去分散等語再該地苗人甚是猖獗又聞要來木樹拏兵查該地去五里米叻地方五十餘里本道隨將吉多新營兵丁派撥五十名令赴米叻駐劄協幫彈壓併不時探聽黔苗聲息再為具報隨飛調乾鳳兩廳各撥兵五十名前來吉多新營添補調用祈於貴標及辰協就近之處再撥四百名協幫新營以備調撥等因到臣臣隨派撥兵丁四百名飭令備弁帶領

貼防去後又於二十一日准鎮草鎮臣周一德密
咨據貴州銅仁副將張禹謨知府姚謙聯銜咨呈
內稱有撫苗官平頭司吏目張公佐太平營把總
張文炳於本月初八日到稿坪清編煙戶跟要案
犯石老明次早被兇苗糾合各執棍棒將二官登
時打傷捉住隨去兵役除飛調各汛兵丁星夜進
剿并飛稟各憲外查黔省新撫苗疆界連楚省祇
有酌留彈壓官兵尚未添設相應咨呈貴鎮臺迅

賜調遣重兵由木樹一路直趨稿坪聲援協勦等情到本鎮據此除檄飭左營遊擊孫載帶兵五百名前赴黔省由木樹一路聲援協勦并具疏

題報外理合咨明又接辰永靖道王柔札同前由各等因到臣臣恐六里紅苗新附版圖性猶未定易滋煽惑所有派撥貼防兵丁四百名僅資彈壓至黔省請兵協勦雖經鎮臣發兵五百名前往應援尚覺兵單必再得官兵隨後接應庶保無虞臣隨

又遣發兵丁五百名飭令臣標後營遊擊劉景榮帶赴黔界聲援協勦臣又思鎮草地地方新經招撫紅苗添設四路營汛今又抽兵五百名前往黔省城汛未免虛懸新開苗疆甚關緊要隨又派撥兵丁三百名飭令臣標前營遊擊董朝輔帶領赴草協幫彈壓仍探聽黔省苗寨情形相機策應以上除鎮臣周一德發兵五百名該鎮自行

題報外臣前後撥派貼防六里并聲援黔省兵丁共

一千二百名於十二月二十二二十四等日節次起程所有遣發官兵緣由俟開印後繕疏密

題外合先具摺奏

聞伏乞

皇上睿鑒施行謹

奏

覽奏俱悉慎重為之不可稍忽所派遣兵數似猶屬單薄母因愛惜小費將就草率致悞事機也

雍正九年三月二十一日湖廣提督臣岳超龍謹
奏為奏

聞事竊臣准鎮筓鎮臣周一德咨稱據貴州銅仁府知
府姚謙副將張禹謨咨稱內開據遊擊白人仙稟
報已於本年三月初六日擒獲正兇石老明等十
二名所有搜捕餘黨現在黔省漢土官兵儘足遣
用可以無煩楚兵至楚省應否撤兵俟具詳請示
到日咨呈等因到鎮是正兇已經擒獲所有前准

貴提督前後調撥赴黔協勦官兵俱有汛防之責
難以久羈隨檄令領兵員弁各帶所部官兵共計
一千五百名撤回原汛再黔省搜捕誠恐餘兇外
竄本鎮仍駐池河分遣標員帶領鎮標兵丁六百
名分駐米叻葫蘆寨防守堵禦等因到臣臣查頑
苗恣肆正兇雖已擒獲餘黨尚未盡除當此搜捕
之際益需兵威彈壓自應倍加詳慎今鎮臣止留
兵六百名分駐米叻葫蘆寨二處兵勢似覺單薄

況苗性反覆不常若見楚兵所撤過多或又四出
竄匿萬一需兵堵截猶恐緩不及調臣再四思維
不敢因鎮臣具

題已撤之兵稍為瞻顧隨於所撤兵丁一千五百名
內將臣標五百名暫停撤回飛飭遊擊劉景榮等
帶回原駐地方以資防範其原撥貼防六里兵丁
四百名亦令仍駐彈壓統俟黔省搜捕事竣再為
一併撤回所餘標協各營兵丁一千名即令各歸

原汎容臣另疏

題報外為此繕摺奏

聞伏乞

皇上睿鑒謹

奏

所見甚是辦理深合機宜

雍正九年四月初九日湖廣提督臣岳超龍謹

奏為敬陳末議仰祈

睿鑒事竊查各省副將叅將於雍正五年內欽奉

上諭著各該省督撫提督會同分別列為一等二等三等
等出具考語密咨兵部填寫履歷繕摺進呈欽此又
雍正六年內欽奉

上諭行文督撫提鎮從前開列等次咨部之副將叅將
近或怠惰前修或悛改舊習雖無功績劣蹟不致於
保薦叅處亦當優等降為劣等劣等陞為優等據實
移咨兵部不必作難回護欽此欽遵俱在案仰見我

皇上隨時甄別人材激勸兼施之至意惟是副叅列等

欽奉

上諭以來舉行一次現今各省副叅陞遷事故屢易其
人多有未經列等之員而遊擊都守等官則又不
得與於列等之數臣思此獎懲鼓勵之良法自應
推廣行之以垂久遠伏查武職五年一次考選軍
政關係激揚

大典其賢能卓異八法不職者照例舉薦糾叅固足

昭示勸懲至不入舉劾之員其中優劣亦異若不
稍為甄別無以策其共奮臣請嗣後舉行軍政各
省督撫提鎮冊送應留之副叅遊都守備等官請
照文職

大計之例部臣查據送到清冊將所開各員操守才
具年力技藝功績及填註考語事實逐細稽核分
別優劣定為一二三等彙冊進呈

御覽仍將所定等次照貴州撫臣張廣泗

奏請文職等次之例

敕部開列行知該督撫提鎮即將原註各該員事實考
語一并印刷粘單通行所屬俾其優劣相形易為
觀感興起至此屆所定等次俟下屆考選之期除
應行舉薦糾叅者該督撫提鎮照例舉行外其仍
行不入舉劾應留供職各員須詳慎稽核如有自
恃優等怠惰前修及能悛改舊習奮勵上進者或
應降優為劣或應陞劣為優逐一據實填明出具

考語送部以聽考察如此則軍政舉劾既昭官方
澄叙之嚴而列等降陞更寓隨時勸懲之意將見
大法小廉莫不鼓舞惕厲共相奮勉矣是否可行
伏乞

聖鑒謹

奏

所議殊無意味勸懲何在於此設或陞劣為優復行改
操降優為劣竟能悛改則前所填考語又不足為憑矣

且亦不勝紛煩徒開臨時鑽營之端耳

雍正九年五月十五日湖廣提督臣岳超龍謹

奏為仰懇

聖恩事竊查湖北湖南界連數省幅員最為遼濶而深山大澤尤易潛藏姦宄臣自抵任以來嚴飭各屬將領督率弁目在於水陸塘汛晝夜巡查復選差千把密往各處察緝匪窩盜線期盡根株惟是賊蹤詭秘臣每留心遣試各弁求其眼力識賊能設

法躡捕者實難其人臣前在天津任內查有天津
城守營千總任福鳳人材精悍饒有膽氣頗能諳
悉賊蹤屢次差拏積賊俱能實力捕獲從無貽誤
臣思天津地方密邇

畿輔非若楚省江湖藪澤姦匪最易潛踪者可比且
任福鳳在津在楚均為

國家效用合無仰懇

天恩請將該弁

賞發臣標補用凡有查緝事件可藉指使足收得人之效如蒙

俞允當俟該弁到楚遇有相宜守備缺出容臣酌量

題請以示策勵臣因地方起見不揣冒昧繕摺恭

奏伏乞

睿鑒施行謹

奏

隔省題官不便准行朕屢有明諭汝獨未之聞乎在楚

數年統轄全省將弁而不能訓導識拔數人以供驅策
乃欲遠調天津弁員朕實代汝愧之何顏具此一奏耶

同日又

奏為遵

旨商酌事本年四月初五日臣准湖南撫臣趙弘恩抄
摺內開湖南一省幅員遼濶江湖寬廣長沙乃省
會重地居兩粵之下游為洞庭之鎖鑰岳州常德
各有水師一在湖之北一在湖之西相距甚遠似

應於長沙添設水師營既可扼守兩粵更可聯絡
岳常水師於地方有益其兵丁船隻倣照岳常之
例設備等因具

奏蒙

皇上命與督臣邁柱及臣岳超龍商酌會題欽遵知會
到臣查長沙一郡控粵濱湖原為形勢之區撫臣
趙弘恩

奏請添設水師亦為裨益地方起見惟是岳常水師

兩營一在湖西一在湖東雖距長稍遠而洞庭一
協駐劄龍陽實與毗連密邇該協額設副將一員
守備一員千把共六員水兵七百零七名戰船五
十隻專轄湖汛外則扼要長衡內則接聯常岳湖
南一面已足特為關鍵似不必於長沙另設水師
方資鎖鑰也況雍正七年於楚省水汛最廣等事
案內督臣邁柱會同臣等

題准將沅州協戰船撥給長沙協八隻衡州協六隻

又令沅州協頭舵水手將長衡二協配船兵丁教習駕駛以為遊巡之用是現今長沙上下江面均已設有戰船堪以稽察防範若再添增水師未免冗置然事關安立營制未敢驟自定議臣遂密致督臣詢其裁酌主見隨准函復無庸增設前來與臣所見相同除密復撫臣趙弘恩外查係奉

旨商酌事理所有長沙無庸增設水師緣由臣謹繕摺奏

聞伏乞

睿鑒謹

奏

何如朕命與爾等商酌正為此也據趙弘恩所言觀之
似是行之徒滋紛擾耳

雍正九年七月二十一日湖廣提督臣岳超龍謹
奏為恭報早稻收成豐稔仰慰

聖懷事竊查湖廣地方民間種藝早晚兩稻今年雨澤

調暢四處豐熟所有旱稻已刈獲登場收成俱足
十分九分倉箱共慶新米盈街兵民安享樂業至
於各處晚稻均皆秀穗結實田水霑足八月內悉
可收割大有在望其雜糧棉花等項亦各茂盛理
合繕摺奏

聞仰慰

聖懷謹

奏

早稻已登晚稻秀實朕以手加額覽之

同日又

奏為鎮臣辦事乖張據實奏明仰祈

睿鑒事竊人臣經

國務矢公忠而職任封疆尤先謀畧況事在鄰省義
無岐視所當推誠置腹協力和衷庶幾兩有裨益
乃鎮守鎮臣周一德懷私挾詐喜事為榮查稿坪
兇苗不法傷害職官黔楚會兵協勦罪無可貸該

鎮駐劄池河堵禦聲援是其專責臣初聞其犒賞
苗人附近各寨花紅酒食意為安撫良苗勿令隨
為黨羽計亦誠是及至安籠鎮臣韓勲統兵進剿
於稿坪兇寨岩峒中搜出周一德發給稿坪苗人
龍老肉委牌一張又搜獲布靴一雙銅號一對皆
係原被打死把總張文炳之物臣聞之殊深駭異
夫龍老肉者乃稿坪殺官之兇苗而該鎮於統兵
會師之際暗與委牌首先獎賜賞其功乎抑賞其

罪乎臣不知其何意雖據該鎮咨辯龍老肉是否
兇首隔省無由而知但下稿坪之苗悖逆顯著何
一非兇龍老肉為該寨苗目尤屬罪魁豈該鎮獨
無聞見乎總之該鎮心意偏私罔知大體鄰封有
事幸藉為功以致逆苗兇寨亦復濫行委賞雖經
臣公移私牘時時勉其協衷共濟該鎮究不能化
其彼此之見殊失公忠體

國之誠因前次黔員有無煩楚兵一語該鎮遂心忿

其言不俟黔省搜捕竟撤楚兵孤其聲援並不籌
計意外尤非大臣持重審度利害者之所宜出也
臣以受

恩深重旦明自矢不敢絲毫欺飾所有鎮臣周一德乖
張之處有忝封疆臣謹據實奏

聞伏乞

皇上睿鑒謹

奏

所奏是候另旨諭部

雍正九年九月十五日湖廣提督臣岳超龍謹

奏為恭報中晚兩稻收成豐稔仰慰

聖懷事竊查湖廣早稻收成豐稔經臣恭摺奏

聞茲查民間中稻已於八月登場晚稻現在刈獲收成
各有十分九分八分不等其棉花芝麻雜豆等項
亦俱豐收遍野今歲農功已畢大有咸書婦子熙
恬倉箱共慶所有中晚兩稻收成豐稔情形理合

恭摺奏

聞伏乞

皇上睿鑒謹

奏

據奏中晚兩稻俱慶豐收朕懷曷勝欣慰

同日又

奏為奏明事竊苗邊汛隘關係緊要臣經

奏明擬往永順鎮筸一帶地方簡閱各營兵馬勘驗

新設營制嗣因六里新闢布置未定臣當於去年
八月內具摺

奏請俟苗疆事竣再往巡歷奉

旨岳超龍所奏甚是俟趙弘恩王柔清理苗疆事竣再
行前往欽此欽遵在案今查六里事宜俱已就緒稿
坪苗寨亦皆凜懼是現今清理已竣臣並宜前往
賞慰堅其向化之心且目下收穫已畢四野豐登
而湖北赴陝兵丁俱經督臣邁柱會同登州鎮臣

岳含奇挑選預備現在祇候

諭旨臣俟料理兵丁起身後即擬輕騎減從前往永順鎮竄一帶查勘新設營制並簡閱兵馬賞慰各處苗寨宣布

聖恩以期寧謐久遠至臣衙門應辦事件臣沿途俱可辦理不致遲悞所有巡歷各處情形臣於旋署日自當據實奏

聞緣係

奏請查邊臣謹另疏具

題請

旨外理合繕摺

奏明伏乞

皇上睿鑒謹

奏

所請巡歷邊隘之處與督臣邁柱商酌行之

雍正十年正月二十八日湖廣提督臣岳超龍謹

奏為新疆之兵食維艱六里之荒田可墾請

准招種以裕久遠事竊惟六里地方苗民性情蠢惰每
年計口種食其山地所獲雜糧僅足自給從無顆
粒之餘兼以新闢極邊亦無商賈運販可資糴買
現今永綏一協兵丁所支米石悉由辰州府轉運
接濟蓋以兵食難緩暫為運辦已非久計況該協
額兵一千六百名皆從各營派撥其眷口尚未搬
移雖經督撫兩臣每兵給與搬家銀三兩今領銀

搬家者僅有二百餘人總因該地無糧可買其眷口移至實有枵腹之虞然察其孤身在營心憂內顧拮据之狀情更可憫臣為再四思維足食之計洵宜預籌茲於六里各處留心踏勘其六七八三里地方氣候融和五九十三里地方氣候稍寒俱各田高水活可以開墾成熟者甚多而山地較廣苗人無力遍種盡為拋荒深屬可惜臣於苗人接見時遂問各寨荒地是否情願售賣據稱苗等不

善治田出產稀薄若有漢人開種苗等得以效法
情願各寨出結相保售賣不敢多事等語臣查苗
民荒田價亦甚廉其情願售賣之言亦非虛捏若
准招買耕種三年以內可得成熟其稻穀雜糧隨
處皆產而永綏兵丁得以就近買食俾其家室相
聚庶可安心汛防將來出產盛多兵米可支折色
又省接濟轉運之煩更與

國計有益為此繕摺

奏請伏乞

聖明裁鑒施行謹

奏

所論雖是然苗漢雜處開墾耕作所關甚鉅當與督撫臣詳細斟酌若意見相同會疏具題可也

同日又

奏為入春雨雪均沾據實恭報仰慰

聖懷事竊查湖廣地方去冬雨雪調勻茲於本年正月

初二初三等日兩湖南北均降瑞雪四野同沾至
十八十九等日又復連滋春雨土膏暢潤當此陽
氣方舒之候而五風十雨應節徵和是

天心早協於

宸衷豐歲預占於蒨屋矣現今二麥長發欣欣向榮臣
沿途目擊情形並據各屬稟報臣謹

奏明仰慰

聖懷伏乞

皇上睿鑒謹

奏

全楚雪雨情形以手加額覽焉

同日又

奏為奏明苗寨情形事竊臣查勘沿邊要隘所過苗寨無不留心察視見其零星散處有十數家為一寨者亦有二三十家為一寨者其百十成聚之村落竟不多覩且一寨之中東西各為向背茅屋竹

籬並無結砦連城之險度其所恃不過以竄匿谿
箐為長技耳今吉多設立永綏一協則紅苗與六
里從中間斷聲勢兩孤況南有鎮筸北有保靖各
寨如在掌握少敢動搖不難扼其吭而制其命也
是以臣巡歷所至苗民仰戴

天恩環跪馬首咸頌我

皇上綏懷遠服准與招撫化誨沾蒙

聖澤得為良民等語臣遂宣布

皇仁面為獎勵賞以銀牌花紅又復嚴切勸導諭以利
害使其凜知

國法震懾

天威而衆苗叩首敬諾同願洗心至於永順保靖一帶
土苗最為淳謹改流之後得安衽席聞臣臨蒞亦
各持香道左籲謝

聖恩感激倍切至地方景象蒸蒸更復日有起色此皆
聖德如天俾遐邇編氓共享寧謐之福也所有苗寨情

形臣宣布賞慰緣由理合一併

奏明伏乞

皇上睿鑒謹

奏

苗性愚頑歸化日淺全在文武官弁撫恤得宜馴至數
十年後相安無事方可驗其成效目前景象奚足為憑
耶

同日又

奏為苗疆極邊仰請逾額增設鳥鎗以資實用事竊
查鎮筰額設鳥鎗一項於雍正六年遵

旨議奏事案內議以該鎮標地處苗邊請照沿邊沿海
之例每兵一千名設立鳥鎗四百桿該鎮標額兵
三千名應設鳥鎗一千二百桿業經彙

題奉

旨允行欽遵在案惟是鎮筰一鎮四面環苗高處則懸
岩峭壁鳥道羊腸深處則曲折盤旋茂林荒菁一

切弓箭藤牌等項無所施其長技惟有鳥鎗衝堅
及遠無往不利況永綏新闢該鎮標四營添設汛
防穿出紅苗官兵防禦要隘遊巡捕伏悉在荒山
窮谷之中既藉鳥鎗之聲息以為響應又憑鳥鎗
之迅速以資搜取所有每兵一千名設立鳥鎗四
百桿實屬不敷分布現據鎮筵鎮臣楊凱呈懇

題請每兵一千名於設立鳥鎗四百桿之外添設二
百桿共六百桿得藉巡防以資實用等因到臣除

移咨督臣邁柱會疏

題請外事關逾額增設烏鎗合先具摺

奏明伏乞

皇上睿鑒謹

奏

具題到日有旨

雍正十年四月二十八日湖廣提督臣岳超龍謹

奏為覆奏事竊臣以六里新闢兵食維艱應請招種

荒地以裕久遠謹將情形繕摺恭

奏奉有

硃批臣遵即致商督撫兩臣詳細斟酌去後當准督臣
邁柱湖南撫臣趙弘恩先後函復謂六里苗地情
願售賣事屬可行惟言者以竄入漢姦恐滋侵占
爭搆為慮近據臬司條議以公項買備牛種勸苗
開墾清查荒地造報課耕似亦得策等語臣思苗
性庸惰每年計口種食不肯廣為耕藝刀鋤火種

是以出產稀薄今查荒課耕勸其自墾若知踴躍
從事則蕪萊漸開不須更事招種惟在實力經理
可期成效以裨新疆但動項查荒等事應聽督撫
兩臣

奏報舉行所有臣等遵

旨詳細斟酌及現在飭議勸墾緣由理合恭摺覆

奏伏乞

皇上睿鑒謹

奏

似此未經深知灼見之事何得率意具奏大不是矣

同日又

奏為奏明事竊查湖南靖州一協原額制兵七百九十名分防靖州綏寧會同通道四州縣地方於雍正五年為苗徭肆虐等事案內經前湖廣督臣福敏等以綏寧一縣屢受苗害請於綏寧專設一營將該協額兵裁撥三百零五名添入新營是該協

汎地尚有一州兩縣而額兵僅存四百八十五名
近據該協以汎廣兵單詳請添增臣細察情形實
屬汎守單弱茲查欽奉

上諭鎮筵新添兵丁四百名甚屬無益酌量派撥要緊
營汎以資防衛欽此欽遵在案臣為酌量靖州協要
緊各汎尚需兵丁二百七十名方數分布臣即擬
於此四百名內酌撥添給洵與邊營有益除現在
咨商督撫兩臣飭議撥給外至所餘兵丁一百三

十名亦在酌量分撥務期增置妥協確核會

題所有靖州協應請撥給兵丁緣由理合恭摺

奏明伏乞

皇上睿鑒謹

奏

具題到日候朕酌定

同日又

奏為要地需員懇

恩遞補事竊臣接到部文欽奉

上諭湖廣寶慶協副將周起鳳著補授陝西西寧總兵
官即赴四川成都於駐藏兵丁換班之時統領前往
駐劄等因欽遵行文到臣臣隨飛檄周起鳳令其作
速束裝起身赴川外伏思寶慶一協地連衡永民
雜苗猺副將大員整飭彈壓控制一面必得練達
熟習之人方克勝任臣查有荊州營叅將董朝輔
歷任湖南守備遊擊風土情形諳悉最久而在營

辦事敏練精幹馭兵有方其於寶慶副將一缺人地極為相宜臣因地方緊要用敢據實

奏請倘蒙

天恩俞允其所遺荊州營叅將一缺亦屬緊要查有臣標後營遊擊劉景榮才幹練達辦事勤敏堪以補授至所遺遊擊員缺查有

命往楚省候補遊擊之徐有文謹飭小心即請以之補授不但各於地方有裨而臣亦得收臂指之效矣

可否俯

准所請出自

聖恩伏乞

皇上睿鑒謹

奏

言之督臣邁柱可也

硃批諭旨卷八十一